

समे — 12:25

<><><><><><>

Railway Minister

केन्द्री रेल मंत्री अश्विनी वैष्णव होरें घोषणा कीती ऐ जे कश्मीर जाने आली रेलगडिडएं गी कारोबारी कम्मकाज लेई तौले गै शुरू कीते जाग। उनें एह बी जानकारी दित्ती जे जम्मू कश्मीर च सब्बने रेल रस्ते पर बिजलीकरण दा कम्म पूरा होई गेआ ऐ। आकाशवाणी जम्मू संवाददाता दी रिपोर्ट मूजब कल रेल भवन नमीं दिल्ली थमां वीडियो प्रेस कांफ्रेंसिंग गी संबोधत करदे होई रेल मंत्री होरें ऐलान कीता ते कटड़ा-श्रीनगर रेलवे लाइन लेई सब्बै जरूरी जांच प्रक्रियाएं गी पूरा करी लैता गेआ ऐ। एहदे च तौले गै कारोबारी कम्मकाज शुरू कीता जाग। उनें एह बी आखेआ, इसलै चला'रदे जम्मू रेलवे स्टेशन दा कम्म सबूरा होई जाने पर जम्मू ते श्रीनगर बश्कार सिद्दा रेल संपर्क जकीनी बनोग। मंत्री होरें इस मौके पर जम्मू कश्मीर च मुख्य रेलवे बुनियादी ढांचे ते विकास परियोजनाएं बारे बी जानकारी दित्ती। उनें आखेआ जे जम्मू कश्मीर च रेलवे सरबन्धी बुनियादी ढांचे ते विकास परियोजनाएं लेई बजट च 8 सौ 74 करोड़ रपे बक्ख रखे गे न जेहदे कन्नै खित्ते च राबते गी बधायी जाग ते एह रेलवे सरबन्धी बुनियादी ढांचे दे विकास प्रति सरकार दी प्रतिबद्धता गी दर्शादा ऐ।

<><><><><><>

Review Minister

केन्द्री गृहमंत्री अमित शाह होर अज्ज लगने आली इक उच्ची सतह दी बैठका च जम्मू कश्मीर दी सुरक्षा ते विकास स्थिति दी समीक्षा करगन। संसद दे नार्थ ब्लाक च लगने आली इस बैठका च जम्मू कश्मीर दे उपराज्यपाल मनोज सिन्हा हुंदे अलावा सिविल पुलिस ते खुफिया विभाग थमां बड्डे अफसर बी शिरकत करगन। गृह विभाग दे वरिष्ठ अफसर ते थेआरबंद बलें दे अध्यक्ष बी मजूद होंगन। आकाशवाणी दे जम्मू संवाददाता नै जानकारी दित्ती ऐ जे बैठक च औंदे म्हीने दरान जदूं पहाड़ें पर बर्फ पिघलना शुरू होई जंदी ऐ ते नियंत्रण रेखा ते अंतर्राष्ट्रीय बन्ने पर घुसपैठ दा खतरा बधी जंदा ऐ, दी सुरक्षा तैआरिएं ते प्रबंधें बारे चर्चा चेचे तौरा पर कीती जाग। सुरक्षा ते विकास सरबन्धी मुद्दें दे इलावा जिने होर विषयें पर सोच बचार होना ऐ, उंदे च मुख्यमंत्री हुंदे कैबिनेट सदस्यें दे इख्तियारें गी केन्द्र शासत प्रदेश दे नियमें कायदें मूजब मुकदा रूप देना बी शामिल ऐ।

<><><><><><>

King Bhutan

भूटान नरेश जिगमे खसर नामग्याल वागचुंक होरें अज्ज बडलै प्रयागराज संगम च वलोबी लाइयै कुभ स्नान कीता। मगरा उंदा अक्षयवट ते बड्डे हनुमान मंदर जिसी लेटे दे हनुमान मंदर दे नां कन्नै बी जानेआ जंदा ऐ। उत्थें बी जाइयै मत्था टेकने दा कार्यक्रम ऐ। एहदे शा पैहले भूटान नरेश उत्तर प्रदेश दे मुख्यमंत्री योगी आदित्यनाथ हुंदे नै ज्हाजै राएं लखनऊ थमां बमरौली पुज्जे ते फही सड़कै रस्तेया महाकुंभ आइयै स्नान कीता। इस मौके उनें पक्षिएं गी चोग बी खलाई। प्रयागराज महाकुंभ दा अज्ज 23मां ध्याड़ा ऐ ते अजें तोड़ी 37 करोड़ कोला मते लोक संगम च चलोबी लाई चुके दे न। कल्लै थमां शुरू होए दे बसंत पंचमी महा स्नान अज्ज बडलै पौने 11 बजे तोड़ी जारी रेहा।

<><><><><><>

IG-BSF

भारतीय पुलस सेवा दे हरियाणा कैडर दे अधिकारी शशांक आनंद होरें गी जम्मू फ्रंटियर आस्तै सीमा सुरक्षाबल दा नमां महानिरीक्षक नियुक्त कीता गेआ ऐ। जम्मू फ्रंटियर च जम्मू थमां कठुआ दी अंतराष्ट्रीय सीमा शामिल ऐ। उनें महानिरीक्षक डी.के.बूरा हुंदी थाहर कम्मकाज सांभेआ ऐ। सीमा सुरक्षा बल उप्पर कठुआ थमां अखनूर तगर 198 किलोमीटर लम्मी अंतराष्ट्रीय सीमा दी सुरक्षा दी जिम्मेदारी ऐ। सीमा सुरक्षा बल गी नियंत्रण रेखा पर सेना कन्नै दूई सुरक्षा पंक्ति दे तौर पर बी तैनात कीता गेआ ऐ।

<><><><><><>

SCO

शंघाई सैहयोग संगठन एससीओ दे महासचिव नूरलान येर्मेक बायेब अज्ज बडलै नमीं दिल्ली पुज्जे। इक सोशल मीडिया पोस्ट च विदेश मंत्रालय दे प्रवक्ता रंधीर जैसवाल होरें आखेआ जे एससीओ महासचिव हुंदा एह दौरा क्षेत्रीय सैहयोग सुरक्षा ते आर्थिक विकास लेई मुल्खै दी वचनबद्धता गी दर्शादा ऐ। येर्मेक बायेब चार दिनें दे दौर पर भारत आए न।

<><><><><><>

Tennis

भारत दे युवा टेनिस स्टार सुमित नागल अर्जनटीना च खेड्डी ला'रदी रोसारियो चैलेंजर्स दे प्रि-क्वाटर फाइनल च पुज्जी गे न। जंदी रातीं खेड्डे गेदे इक मकाबले च सुमित नै अर्जनटीना दे रेंजो ओलिवो गी 32 दौर दे मकाबले च 5-7, 6-1, 6-0 कन्नै जित्त हासल कीती। अजें कि मैच च उंदी शुरूआत कोई खरी नेई रेही ते पैहले सेट च उनेंगी हार दा सामना करना पेआ पर मगरा उनें मौका सांभी लेआ ते शानदार जित्त हासल कीती।

<><><><><><>